

Cronica dalla Societad da musica Trun Onn da musica 2019/2020

25-10-19

155avla radunonza generala dalla SMT el Café Tschut.

06-12 ed ils 14-12-19

Suenter la pausa da stad ha la SMT entschiet en il niev onn da musica. Duront dus exerchezis han las commembras ed ils commembers dalla SMT empiru d'enconuscher ils novs tocs.

28-12-19

In onn da musica cun grond success alla fiasta cantunala ad Arosa ed era da nies concert annual va alla fin. Campiuns mundials essan nus vegni cun il toc Synchronized.

Sin quei success e sco usitau ein las commembras ed ils commembers dalla SMT ed ils gidonters sentupai ell'Ustria Ischi tier la sera da ventschidas. Nus havein passentau in'emperneivla sera cun ina fetg buna tscheina ed enzacons giugs.

10-01-20

L'entschatta schaner ha la SMT entschiet en cun igl emprend exerceci dil niev onn da musica.

07-02-20

Nies veteran e commember d'honor Odilo Caduff ha bandunau ils 01-02-2020 il terrester per adina. Oz havein nus accumpignau nies car Odilo sin siu davos viadi e dau ad el nies davos salid musical.

07-03-20

A caschun digl 85avel di da naschientscha da nies veteran e commember d'honor Gion Giachen Capaul havein nus sunau la sera tier el avon casa a Pustget. Gion Giachen ha giu fetg grond plascher.

13-03-20

Oz ha la confederaziun ed il cantun decidu sin fundament dalla situaziun actuala dil virus da corona che tut las occurenzas ed era ils exerchezis dad uniuns ein scumandai entochen ils 30-4-20. Aschia che nies concert annual croda uonn. La sanadad e la segirtad da mintgin va avon tut igl auter.

29-03-20

Duront il temps da Corona ha Adrian giu ina idea fetg creativa. Sut sia bitgetta ha la SMT fatg furora silla plattafuorma digitala Youtube cun il marsch Arosa dad Oscar Tschuor, mirei e gudi:

<https://www.youtube.com/watch?v=q60cCRLVyoE>

Il commentari dad Adrian sin Youtube:

"Concert annual datti buca uonn. Senza in schatg musical lein nus denton buca schar vargar la primavera. Entochen il proxim onn da musica. Stei sauns, stei leghers e sin seveser!"

Igl RTR ha era publicau quei video sin l'atgna plattafuorma digitala. Las reacziuns da vischins ed enconuschents dil vitg e d'ordlunder ein stadas fetg positivas. Quei video ha procurau per entginas emoziuns ed in ni l'auter larmin dil plascher! In engraziel fetg a ti Adrian per tia gronda lavur!

30-04-20

La situaziun da Corona ei buca vegnida megliera aschia che tut ils exerchezis ed occurenzas crodan era per il proxim temps. Era la fiasta districtuala a Vignogn croda ed ei vegnida stuschada sin 2021.

10-05-20

Al di dallas mummas ha ina pintga delegaziun dalla SMT engraziau a tut las mummas silla Casa s. Martin. Engraziel a Vus zun fetg.

20-05-20

Nies commember Tino Cadruvi ha scret sia lavur d'approfondaziun sur dalla SMT ed il svilup da commembras e commembers. Vus saveis leger l'entira lavur sut il suandont linc:

https://www.musicatrunch.ch/wp-content/uploads/2020/06/Societad-da-musica-Trun-svilup-da-commembers_Original.pdf

Engraziel per l'interessanta lavur sur dalla problematica da biaras musicas en nossa vallada: Il digren dil diember da commembras e commembers.

21-08-20

Suenter la liunga pausa da Corona ha la SMT finalmein puspei astgau entscheiver en cun ils exerchezis. Cun tener en las restricziuns da Corona havein nus giu in empres empreneivel, denton era plitost nunusitau exerceci. Da niev stuein nus tener en la distanza da 1.5 meters tier autras persunas durant igl exerceci ed era da pausa e suenter igl exerceci. La spida astgein nus mo schar ir ora sin in pupi da cuschina che vegn bess suenter da mintgin el canaster da pupi.

Ils suandonts tocs ha nies dirigent encuretga ora per il pign project d'atun:

- A Russian Night
- Borsicka Polka
- Eternal Father Strong To Save
- San Carlo
- The Bombardier
- The Lord Is Gracious

CONCEPT DA PROTECZIUN PER ILS EXERCEZIS DIGL ATUN 2020

Muort las perscripziuns dalla confederaziun e dil cantun ein las suandontas reglas da suandar durant ils exerchezis:

- Sch'enzatgi sinfectescha cun il virus da Corona sto el immediat s'annunziar tier Gion Simeon.
- Persunas cun simptoms da malatia astgan buca prender part als exerchezis (las absenzas ein da comunicar a Gion Simeon).
- Persunas da resca prendan part facultativ als exerchezis.
- Durant ils exerchezis eis ei da tener en la distanza dad 1.5 meters.
- Per saver tener en las distanzas prescettas vegnan ils exerchezis frequentai en la sala da cultura e buca sin tribuna.
- Cu ins entra en la sala da cultura eis ei immediat da desinfectar ni lavar ils mauns.
- Las suppias ina sper l'otra ston haver 1 meter distanza ina da l'otra e la distanza denter la retscha davon e davos sto mesurar 1.5 meters.

- L'aua condensada sto vegnir rimnada en in fazalet / schigientamauns, ella astga buca ir sin il plantschiu.
- Ils instruments duvrai communabels (percussiu) ston vegnir schubergiai / desinfectai dil meinaregister.


22-08-20

Quella sonda ha la SMT fatg lavur cumina ella regiun da Nadels Davon. Nus essan stai 15 persunas ed havein rumiau l'alp da pignola pintga e gronda. Nus havein luvrau en treis differentas gruppas cun forschs ni cun pli gronds uaffens. Vida mesa las dudisch ha ei entschiet en a plover. Nus havein calau culla lavur ed essan ir a Nadels davon sin ina bubronda caulda. Suenten ina cuorta pausa ha aunc ina gruppa luvrau in'uretta. Silsuenten havein nus grilau e magliau si Nadels Davon. Engraziel fetg a quels ch'ei stai.

20-09-20

Suenten la liunga pausa da Corona ha la SMT finalmein puspei astgau sepresentar l'emprema gada sin plaz cadruvi alla caschun dalla fiasta da dumengi'alva. La populaziun ha giu grond plascher ed era las commembras ed ils commembers dalla SMT han gudiu d'astgar sepresentar avon in publicum.

In per dis suenten la producziun ha la SMT survegniu ina carta d'engraziament per il pign concert dalla fiasta da duemngi'alva. Engraziel, quei hai aunc mai dau ella historia dalla SMT. Quei fa grond plascher!



Carta d'engraziament dallas premcommunicantas e dils premcommunicants digl onn 2020.

04-10-20

A caschun dalla dumengia dil s. Rusari ha la SMT buca mo sunau sin plaz cadruvi a per la perdanonza a Trun, denton era aunc per treis giubilar:

- Vincenz-Pally Margrit (90 onns), di da naschientscha ils 19-07-1930
- Vinzens Oskar (90 onns) di da naschientscha ils 03-08-1930
- Nay Oscar (90 onns) di da naschientscha ils 05-08-1930.

Oscar Nay ha fatg in grondius plaid avon la SMT ed era avon la populaziun che ha segramein cuzzau 12 minutas. Aschi fit cun 90 onns, chapeau!

In secund salid musical ha la SMT era aunc purtau silla Casa s. Martin quei di.

Il diember actual da commembras e commembers dalla SMT dumbra 26.

october 2020

Igl actuar, Andriu Tambornino